

欽定大清會典事例

欽定大清會典事例卷三百九十一

禮部

學校

生童戶籍

生童戶籍。順治元年題准。設寓學於

京師。遠方士子游學者。取的當保結。赴順天府學
一。例考試。又設廩生十名。照縣學例充貢。○二
年題准。寓學諸生。本年鄉試。暫分監生中額三
名。嗣後皆發回本省。如父母墳墓向在北方。即
係土著。學政覈實。令入籍應試。○又定。生童有
籍貫假冒者。盡行褫革。仍將廩保懲黜。如祖父

入籍在二十年以上墳墓田宅俱有的據方准
應試。○十年題准各處生童願赴遼東入籍應
試者由本地方官起文赴部送至遼東墾田附
籍。○十一年題准教職子弟隨任入學者嚴加
考試如文理明通發回原籍肄業其餘嚴行黜
革。○十四年題准直省俊秀願充遼生者許全
家移住令該府收入版籍一體考試。○十七年
議准湖廣平清偏鎮四衛赴貴州考試。○康熙
五年題准遼生寄籍山東者歸併山東各學考
試寄籍永平者歸併永平府學考試其山東永

平寄籍遵生。並夾字號名色。俱行除去。○十年題准。四川省士子寄籍他省入學者。各省巡撫察詢。自順治元年以來。有願回籍者。令其回籍。蜀撫覈明本生籍貫。撥入該府州縣儒學考試。四川學政將回籍生員造冊報部。各省學政亦於報部冊內註明回籍。以便察覈。如有冒籍四川希圖應試者。本生黜革治罪。該地方官叅處。○又題准。安插墾荒武弁。永駐入籍納糧當差者。其子弟一體考試。○十六年議准。凡監生生員有冒籍者。許本生赴部自首。改歸原籍。免其

黜革。在外赴學政自首。改正報部。○二十七年覆准。湖廣省平溪清浪二衛。因改隸武昌。相距二千五百里。赴試維艱。仍令赴貴州考試。○三十九年覆准。在京冒籍生員。除入籍二十年以上者不議外。餘以部文到日為始。限兩月內具呈自首。改歸原籍。如過期仍照例黜革。○四十年覆准。嗣後如彼州縣人。在此州縣入學。又同省異府。同府異縣。冒籍入學。許本籍童生出首。將失察各官。題叅治罪。○又覆准。廣西省土官土目子弟。有願考試者。先送附近儒學讀書。確

驗鄉音收送。如試官竟自收考。及土官禁遏與試者。該撫題參。交部嚴加議處。○四十二年題准。貴州省生童。照滇省例。許同省各府之人應考。俟人文充盛。再行禁止。○六十年覆准。直隸省冒籍生員。以部文到日為始。限兩月內具呈自首改歸。各省亦照此例遵行。○又議准。直隸省保定等衛軍戶。俱係土著。恐不肖之徒。假冒衛籍。嚴飭查明出結。中式後如有頂冒等弊。本生照假官例治罪。送考及出結官。照徇庇例處分。康熙黜革。○雍正二年覆准。貴州省儒童。日

漸增益。即下州小縣。亦可不至缺額。嗣後將考取童生。隔府隔縣撥入別學之例。永行禁止。○又覆准。各省異籍之人。每臨期冒稱本省居住。寫達頂替代倩。無從查覈。令該學政飭地方官。並提調官。教官嚴行禁止。如有徇私容隱等弊。察出。將冒籍之人。與頂替代倩並保結之人。從重究治。該地方官。並提調官。教官。照例議處。○又覆准。寄籍生員內。有食廩挨貢者。照康熙六十年之例。盡行改歸原籍。食廩挨貢。悉照本身年分次序。其父兄既經改歸。則子弟自不能援

例冒籍。○三年覆准。直隸省冒籍生員。自康熙六十年議定後。已逾四年。尚未盡照改歸原籍限期兩月之例辦理。嗣後有未經呈首者。一概不准改歸。察出照例黜革。○又覆准。貴州省黎平府永從縣二學。半係五開衛人。今五開銅鼓歸黔管轄。其童生仍就黔考試。至黎平永從三學。自衛改縣治。劃清地界。今隸府屬者歸府。隸衛屬者歸縣。仍將分隸之處報部。○又覆准。廣東省廣州十二衛。東莞等二十六所。軍戶田糧皆歸於附近州縣。其衛所軍童入學。原有定額。

名數。今一衛所戶口屯糧。有收入附近數州縣者。各就屯糧歸併之州縣。考錄申送。○四年覆准。甘肅省平涼衛附近屯民。編列衛籍。概赴平涼縣考試。照舊撥府學兼管。岷州衛西固所附近屯民。亦概赴岷州廳考試。其歸德所。向係河州統轄。今河州衛雖裁。而生童考試歸併河州。其歸德所生童。亦照例附入河州考試。○五年覆准。

盛京幅員廣闊。未便總屬奉天府學教官稽察。現在滿合字號入學諸生一百十九人。詢明居址。

撥歸各相近之州縣學。令該學教官與本學民籍生員一同管束。每遇歲科正考。即由該學申送府丞考試。一案發落。按其名次補廩補增出貢。其現在府城及承德縣界居住者。仍隸府學。嗣後滿合童生考試之前。先令該將軍將各童居址開送府丞。以憑入學時撥附近之州縣學。○又議准。東川一府改歸雲南。所有四川省府州縣寄籍東川入學各生。令赴雲南應試。遠涉為難。應將寄籍東川府入學各生。俱改歸川省本籍各府州縣應試。其東川府土著文武生。仍

歸併雲南應試。嗣後鄰近府州縣童生。不許赴東川府考試。○又議准。臺灣歲科兩試。飭令該地方官查明。現住臺地。置有田產入籍既定之人。取具鄰里結狀。方許送考。如有冒籍臺地入學者。察出將該地方官題參議處。本童照冒籍例治罪。至從前已經冒籍進學之文武諸生。限兩月內具呈自首。該地方官會同教官逐一查明。俱令改歸原籍考試。如過期不行呈首。一經發覺。黜革治罪。○六年議准。寄籍廩生改歸者。皆改為候廩。與原籍諸生照考案先後挨次新

舊聞補。至歲科考試童生。飭令該地方官。覈明實係土著之人。取具廩生的保。五童連名互結。方准收考。儻有仍前冒考者。除本童照冒籍例治罪外。並將廩保黜革。互結之各童。一同治罪。仍將收考地方官。照濫行收考例。降一級調用。○又議准。廣東省韶州右翼鎮三營兵丁。隨師入廣。迄今三世。分防各縣。田宅墳墓。皆在斯土。無籍可歸。與入籍二十年以上之例相符。應准其入籍分防之各縣。照商童用商人保結之例。於縣考時。令該管之千總把總出結保送。並令

各營童五名互結。先期投遞本營專轄官。以便移送入籍各縣。該縣驗明。即准收考。儻有不係兵丁子弟。及入籍未滿二十年者。本童並互結各童。及濫行出結之武弁。照例治罪。再民籍廩生。與營童聲氣不通。恐藉端勒索。業有本營保送。暫停民籍廩保。俟營童中有入學補廩者。再行保結。其別處有與韶州鎮事體相同者。照此例行。○又覆准。江南省蕪湖寄籍童生。計其入籍已二十年以上。該地方官覈其入籍年分。造冊申送學政與考。其已經入籍蕪湖之人。不許

仍在原籍地方考試。○又覆准。廣東省廣州朝
州等府屬。向有通考之弊。隔府隔縣。濫冒入學
者甚多。童生取進後。各歸本籍。教官多不識面。
百弊叢生。照臺灣改歸本籍之例。限兩月內具
呈自首。該地方官會同教官。逐一查明。改歸原
籍。○七年議准。浙屬冒籍文武生員。除入籍二
十年以上。有田產廬墓者不議外。其餘照臺灣
例。限文到兩月內具呈自首。改歸原籍。其廩增
改為候廩候增。俟改歸後考居優等。即與本籍
諸生按名次間補。仍照原食餼年分挨次出貢。

如過期不首黜革治罪。○又覆准四川省烏蒙

後改昭通府。

鎮雄

後改州。

二府改歸雲南。應將寄籍二

府生員並舉貢監生按其實籍貫改歸應試。

除烏蒙府並無土著生員不議外其鎮雄府土

著文武生員及舉貢監生均改歸雲南應試。該

撫造冊報部。○又議准湖南省鎮谿所學生員

九十餘名外籍冒占者三十餘名照冒籍苗徭

改歸之例限兩月內具呈自首地方官教官察

明改歸原籍其中廩增改歸者令其以附生應

試俟改歸考居優等方准挨補嗣後再有冒籍

鎮谿所者。將該地方官。照明收冒籍童生以占
本縣正額之例。降二級調用。廩生即行黜革。本
童照冒籍例治罪。又辰州屬之五寨司。向來亦
多冒籍。亦照此例清釐。該學政仍造清冊報部
稽察。○八年議准。福建省各郡縣冒籍生員。照
臺灣改歸之例。該地方官會同教官。以部文到
日。限兩月內許其自首。改歸原籍。以便就近稽
察。過期不首。黜革治罪。其廩增改歸者。俱改為
候廩候增。俟改歸後。考居優等。准其與原籍諸
生一體按名次幫補。仍照原食餼年分挨次出

貢。○又議准。江蘇省所屬。一水相通。而江浙兩省。復土壤相接。從前隔省及同省異府。同府異縣之人。冒考取進者甚多。照廣浙二省之例。具呈自首。改歸原籍。逾限兩月不首。照例治罪。廩增改歸並改歸後出貢之處。均照廣浙之例行。○又議准。四川省同屬州縣。互相冒考之弊。嗣後應嚴行禁止。○九年覆准。湖北省從前寄籍諸生。照浙江之例。限文到兩月。許其呈首改歸原籍。但自首改歸諸生。又多冒名頂替之弊。今湖北生員。有遠至數百里十餘里者。居址遼隔。

真假難稽。以甲換乙。勢所不免。嗣後該生於自首呈內。開明原籍族黨鄰里三代名字。及本身年貌。因何冒籍原由。該地方官會同該學教官查覈明晰。加具印甘各結。造冊報部。改籍應試。如仍有冒名頂替等弊。發覺將出結各官嚴加議處。其應試童生。照入籍二十年定例收考。如有仍前冒濫送考者。將本童並送考之地方官照例議處。又議准。江西省棚民。近年讀書愈衆。飭令地方官逐一清查。有實在入籍二十年以上。有田糧廬墓者。即在各居住之州縣一體考

試量加入學額數。其年例不符者。不許濫行收考。至棚民之兄弟叔姪及外姻親屬。仍居原籍。未曾同為棚民者。不許頂冒應試。本籍童生。亦不得混入棚民內冒考。違者均照冒籍例治罪。本童各於應考時。取具鄰里甘結。及五童互結。方許報名應試。○又覆准廣西省泗城鎮安二府。現無應試童生。如外省及本省異府之人。有情願入籍者。具呈府縣。收入煙戶冊。即申詳布政使司。咨詢本籍。如無過犯。入籍考試。仍呈明學政衙門註冊。該學政於考試時。按籍而稽。如

冊內無名。不得濫考。入學中舉之後。照奉天定例。不許移回原籍。其子弟及兄弟之子。同時入籍。有名者准其考試。無名者不准冒考。至入籍後。飭令地方官嚴行稽察。如有行蹤詭秘。不守本分者。立即逐回本籍。地方官失於覺察。該管上司指名題參。照例議處。再泗鎮二府既無廩生。則入籍考試之人。即為土著童子之師。使之薰陶漸染。以開其愚蒙。至應試時。即令以業師保結。其慶遠府屬之荔波州。東蘭州。太平府屬之甯明州。亦照此例行。嗣後如有土屬內以土

改流之川縣亦均照此例。俟十科後均行停止。
○又覆准。楚省士子寄籍黔省入學。越占黔省
士子額數。照浙省改歸原籍之例。令地方官會
同教官。將黔中寄學各生。逐一改歸楚省。該學
政別造清冊。報部察覈。○又覆准。順天府考試
童生。例由大興宛平二縣嚴加審音。的係本籍
童生。然後造冊。由府送院。嗣後由府尹不時稽
察。如該縣視為具文。朦朧申送。照徇庇例議處。
如既經送院之後。不肖廩保有藉端索詐者。亦
照例治罪。○又覆准。四川省茂州羌民。久列版

圖載糧入冊。與齊民無異。嗣後與漢民一同應試。卷面不必分別漢羌。取額不必加增。憑文去取。廩貢科舉。一循定制。俟人文蔚起。再行增額。其所屬汶保二縣羌民。果能觀感興起。亦照此例考試。○十年覆准。嗣後苗童應試。用漢廩生一名。苗生一名。不論廩增附生。公同聯名保結。照定例用五童互結。如有民童冒入苗籍者。一經查出。將保結各生。究問褫革。教官濫行收試者。題參議處。○十一年議准。江南省崇明。昭文。士子。必查明住居外沙。果有廬舍墳墓可憑。方

許入籍赴通州考試。其住居崇昭地方者。不得以田地。在通。妄行冒考。若外沙並無住居廬舍墳墓。而冒考通籍者。將該童與扶同保結之廩生。一併照例斥革。○又議准。粵東冒籍生員。捐納貢監。由該學政驗明執照。查與學冊無異。取具該府縣學及里鄰戶首。並無頂替印甘各結。覈定名數。造冊報部改歸。如有不肖貢監賄通地方官教官。將並非冒籍之貢監轉售改撥者。發覺將該貢監斥革治罪外。該地方官教官與該學政。一併交部議處。○十二年議准。嗣後寄

籍之恩拔歲貢生。勒限三月。呈首地方官。申詳學政。改歸本籍。其現任教官內。有係本邑及鄰邑之人。亦令呈明改歸本籍。仍聽隔府調補。如逾限不行呈明。一經查出。照冒籍例題參。褫革治罪。至由俊秀寄籍捐納貢生者。亦令地方官飭令依限自首。一例改正。○又覆准。各省教官有隨任子弟。遇考試時。即在現任地方冒籍入學。殊干定例。嗣後遇歲科考試。令該教官出具並無子弟隨任冒考印甘各結。申送學政衙門存案。如有仍前冒考者。一經發覺。除將本童及

廩保褫革治罪。仍將該教官題參議處。其從前有隨任冒考入學者。以文到日為始。限兩月內具呈自首。改歸原籍。如逾限不行呈首。查出照例黜革。○又議准。凡他學貢監生員重考入順天學。及他學廩生重入順天學補廩者。於兩月內令其自首。該學政查明。除去順天學內之名。咨明本籍。仍留貢監生員。儻過期不首。發覺兩處衣頂。盡行斥革。嗣後歲科兩試。如有仍蹈前轍兩處冒考者。必重治其罪。○十三年議准。四川省各屬寄籍之生員。限文到兩月內具呈自

首。該地方官會同教官。逐一改歸原籍。其子弟亦令隨父兄改歸本籍考試。如寄籍各生有逾限不首。及子弟有仍前冒考者。將該生究問黜革。冒考之子弟嚴加懲治。○又覆准。廣東省廣州等府。從前考進雷瓊等府屬之貢監。現在呈首者。該學政造冊報部改歸。其未經呈首者。以文到日為始。限兩月自首改正。如限內不首。一概不准改歸。將來僉在地方恃符生事。或經訪聞。或被告發。係附籍之貢監。照例黜革。仍從重究處。○又覆准。廣東省各衛所屯軍籍童生。額

多人少。且軍民兩籍冒考。控訐不已。嗣後照直隸河間等衛裁併歸縣之例。將該省各衛所屯童生。歸入現在居住納糧之州縣民籍內應試。所遺各軍籍撥入各該府學文武童生額數。於各該屬州縣民籍內。一同憑文撥取。又覆准貴州省畢節縣所屬之赤水河北地方。撥歸永甯縣。統歸川省管轄。所有赤水河北儒童。自永甯歸川後。即赴永甯考試。入學已逾三年。而文武生員歲科兩試。至今仍赴黔省。所有畢節縣河北地方文武生員。改歸永甯縣。仍令該學政

備造清冊。送部查覈。並嚴飭改歸以後。不得仍
入原籍考試。○乾隆元年。覆准雲南省廣南。麗
江。普洱三府。及昭通府屬之思安。永善二縣。鎮
沅府屬之恩樂縣。東川府屬之會澤縣。現在夷
多。漢少。人文寥落。難以敷額。除現任本處官員
子弟。不准入籍考試外。如有異省及本省異府
之人。願移家入籍者。照廣西太平等府之例。同
土著之人。一同考試。或該地方漸染薰陶。人文
日盛。可以無虞缺額。即奏請停止。其從前寄籍
各學之生。免其改歸原籍。○二年。覆准江南省

昭文崇明士子考試。將薛家等沙畫定界址。以崇明之半洋大安戲臺沙為準。沙以南赴昭文。崇明考試。沙以北赴通州考試。其有田產在江北沙洲而現今居住崇明境內及新近遷入通界未及二十年者。仍在昭文崇明考試。其向係沙洲入籍在通。現有廬舍戶冊足據。不論是否二十年有無墳墓。皆得赴通考試。如將應在該州考試之人。妄行改訐及廩保抑勒者。照例分別治罪。至從前冒考通籍入學者。照寄籍改歸之例。限文到兩月內。據實自首。改歸原籍。如逾

限不首。即照冒籍例治罪。○又停止四川省寄籍改歸之例。○三年。停止廣西省泗城鎮安二府及慶遠府屬之東蘭州。嘉波縣後改隸貴州太平府屬之甯明州。外省入籍考試之例。仍由該撫轉飭該地方官留心稽查。嗣後有外省之人竄名冒考情弊。將本人及廩保照例治罪。並將失察官員題參議處。○又覆准。無籍可歸者。其入籍之年。與定例相符。概予收考。其或寄籍地方。雖有田廬。而實有原籍可歸。由地方官彼此開會。將此等童生。撥回原籍考試。儻實在無籍可

歸申詳督撫學政。許其應考立案。如無知之徒。聚衆攻擊者。為首照誣告人杖罪。加所誣罪三等律杖六十。徒一年。為從減一等杖一百。仍停其考試。○四年覆准。廣西省泗城鎮安慶遠等府。西隆。歸順。東蘭等州。外省入學之文武生六十餘名。非現任官之子弟親戚。即各衙門西席幕賓。應由該學政究明。咨回本籍肄業。應試。仍分析造冊報部。以杜冒濫。○又覆准。從前冒籍順天生員。除康熙六十年雍正十三年勒令改歸後。或仍有實係南人。認宗冒考。或本係南生。

重考入學者。統以一年為限。令該教官逐一詳報學政暨順天府丞。並許該生自首。均改歸原籍。如逾限不改。查出褫革。仍令該教官出具並無冒籍印結。申詳存案。務秉公確實。毋許藉端苛求。嗣後考試。仍令該學政嚴飭該教官廩生等。於應試童生。務逐一認識。出具保結。該縣及該府丞於府縣考之前。詳加審音。儻仍有前項認宗冒考等弊。除本人治罪外。仍將不行稽查之各該管官及廩保等。照例分別議處。○七年議准。安插江西省改土為流之土司子弟。照湖

廣等省苗徭例。一同入籍考試。九年覆准。四
川省土著甚少。多係湖廣遷移之人。各府州縣
互相冒籍入學。嗣後有居住該州縣而入學他
邑。限文到兩月內自行呈首。將里居田糧墳墓
逐一造冊。該州縣務徹底清釐。冊送學政查覈。
仍交該教官一體考察。按季報學政。分別勸懲。
如逾限不行呈首。即行褫革。○十年

諭冒籍頂名。例有嚴禁。况歲科考試。為士子進身之始。
尤宜加意清釐。以肅學政。今江蘇地方童生應試。率
皆彼此通融互考。且有一人冒考數處。或多作重卷。

數名。以為院試時售賣之地者。此種弊端。所聞士習匪淺。朕思各府州縣皆有煙戶冊籍。難以蒙混。誠於州縣考試之時。童生報名。查對煙戶無訛。方許廩保填結。府考院考俱令原保廩生識認。則冒籍頂名之弊可除。著該督撫轉飭所屬實力奉行。不得視為故事。該學政亦不時稽察。如有仍蹈前轍者。查明按律究治。○又覆准冒籍順天考試之人。除入籍二十年並無原籍可歸外。其未滿二十年及已滿二十年有原籍可歸者。統以文到日一年為限。由科甲出身之現任官及候選之進士舉人貢監具

呈大興宛平二縣申順天府尹。廩增附生員呈
該學教官申順天府丞轉申學政。均咨回本籍
報吏部禮部註冊。生員食餼挨貢。照舊例按年
月次序。如逾限不改。一經發覺。生監舉貢及職
官進士。皆照例黜革。奉行不力之該管官。罰俸
一年。自行查出者免議。○又覆准順天府丞考
試移咨都察院。奏委滿漢御史各一人會同審
音。如有冒籍者。將廩保褫革。照變亂版籍律杖
八十。受財者計贓論。○十一年議准福建省福
州府之侯官縣。閩縣。福清縣。漳州府之龍溪。漳

浦海澄南靖平和等縣業已通同混考十餘年。嗣後由該撫學政轉飭福州漳州二府現在冒籍各該州縣及教官徹底清查。有彼此入籍入學生員。悉令於文到三月內具呈本縣詳請更正本籍。免其黜革治罪。仍令該管教官出具並無冒籍印結。申送學臣查覈。儻逾限不首。一經查出。即行黜革。該教官題叅議處。○二十一年議准。廣東省鶴山縣自雍正九年新設時。有廣州府民人一百五戶。願捐修城工。經部議給還捐項。以為墾荒築室工本。許其子弟入籍應試。

令廣東巡撫轉飭確查。此百五戶民人曾經築壑。現居鶴山縣。仍准應試。其餘戶丁。必俟其築室任耕。呈明地方官。給有門牌。列入煙戶冊。方准應試。仍移咨原籍。不得兩處重考。其本籍現有廬墓田糧。不願徙居鶴山者。即在本籍應試。○二十二年議奏。順天冒籍各生。暫停其南北歲科兩試。俟該省布政司轉飭本籍州縣官查明。並非假冒頂替。詳覆順天學政。方准咨回原籍入冊收試。除已經確查取結者。即聽歲科鄉試外。其咨查原冊未經入籍之生。仍停其鄉試。

奉

旨。此等冒籍生員。即永停鄉試。亦不為過。若未經查明。
遽准與試。必致仍多弊混。著將冒籍各生停鄉試一
科。以便通行清釐。永杜冒濫。○又議准。貢監內南省
人冒捐大興宛平籍貫者。令順天府尹督率大
興宛平兩縣。逐一詳查。煙戶冊籍。送考文案。並
出示曉諭各該生。速為呈報。如果散處在外。親
族人等皆可代為呈首。該縣即據呈申報。不必
又取京官印結。致滋吏胥抑勒需索之弊。儻該
縣不實力稽查。屆期混請黜革。該府尹即照原

議參奏。照審音不實降一級調用例議處。至於
既經清查之後。土著若干。冒籍改正若干。皆有
的確總數。應令兩縣按數造冊送部查覈。並彙
申府尹奏明。以杜草率完結之弊。其查無蹤迹
並不首明之冒籍。既逾定限。自必俟另案發覺。
問其原籍何處。照例黜革。以儆冒濫。再改歸之
貢監例。得換給執照。改註本籍本姓。即由各該
原籍地方官確查申送咨部。換照給發。戶部仍
知照禮部存案。至將來凡由大興宛平兩縣籍
貫報捐貢監者。該府尹嚴飭兩縣。於奉到部文

之後。即將報捐之人。按名清查。實係土著及例
准入籍者。俱取具鄰族甘結申送。如果全無親
族子弟。以及並無墳墓廬舍可考。即行報部黜
革。毋得仍前濫行入冊。○二十三年

諭。金德瑛奏大興冒籍廩生丁泗。既不遵例改歸原
籍。復句通謝國賓等扶同出結。出身硬證。已將丁泗
除名。並請將謝國賓黜革等語。冒籍生童。向來相沿
日甚。最為惡習。理應嚴究。其定限一年。勒令自首改
歸。原係從寬辦理。予以自新之路。今丁泗既不遵守
功令。復串通本地劣衿捏結蒙混。而謝國賓等從中

包攬舞弊營私。若僅予黜革。將來故智復萌。易名冒考。事所必有。終無以杜夤緣頂名之弊。且衆人亦不能共知懲創。所有丁泗謝國賓等。俱著交刑部治罪。

○又議覆。凡冒籍生員。業經查明改回原籍者。仍停鄉試一科。○二十五年議定。廣西省冒籍。由該學政徹底清釐。除現在查明者。勒令改歸本籍。其未經查明者。於文到日。勒限一年。著落本生自首。由該學教官會同州縣覈實取結。詳送學臣。咨回原籍。仍取具本籍地方官及儒學印結。送部查覈。逾限不首者。一經發覺。即將該

生黜革。仍將不行嚴查之地方官及儒學照例議處。本年係鄉試之期。所有已經查確冒籍各生。照例罰停鄉試一科。不准與試。其有在限內陸續查出者。照例畫一辦理。並行文雲南貴州四川廣東等省學政。留心查察。毋致冒試滋弊。○又議准。各省三流發遣及安置為民各犯。原係罪應遷徙。既到配所。即係彼地編氓。如有嫡屬子孫同赴配所。情願應考者。令該犯於到配時。呈報地方官立案。不拘年限。入籍考試。其非係嫡屬子孫。雖隨行撫養。概不許託名混冒。仍

責令各該地方官嚴行稽查。僅有倚恃親屬希圖冒籍者。本犯照例治罪。失察之地方官。照混行收考例降一級調用。○二十九年。准廣東省新甯縣沿海地寬。有潮嘉一帶客民二千餘戶。陸續來甯就耕。置有田產廬墓。丁糧煙戶各冊俱已有名。嗣後交該督撫嚴飭地方官徹底清查。現在就耕者若干戶。有志應考者若干丁。果無原籍可歸者。即入於新甯應試。不得潛回潮嘉原籍跨考。其有籍可歸者。令仍赴原籍。不得混占新甯之籍。嗣後客民土著。均不得藉詞

興訟違者治罪。仍將查辦緣由報部存案。其新甯學額不得照江西棚民之例議加。○又議准臺灣四縣多福興泉漳之人。往往指同姓在臺居住者。認為弟姪赴考。嗣後交該督撫及臺灣道轉飭地方官查明的。係入籍二十年以上。並無原籍可歸者。方准考試。如有冒籍赴考。除將本童及廩保照例治罪外。地方官一併查參議處。至現在已經冒籍入學各生。照例勒限一年改歸原籍。如地方官奉行不力。該督撫指名叅處。○三十四年議准江蘇省吳縣太湖內東西

兩山一切民事。分隸太湖同知就近管理。其分隸地方。俱以湖面為界。所轄舉貢生監。遇有丁憂服闋事故等項。就近取結送部。監生北闡鄉試。亦令歸廳給文。其鄉會科場起送。並舉報節孝等案。令吳縣儒學查明送廳轉詳。至文武生員。該廳既未分設儒學。仍歸吳縣儒學管束。歲科考試文武童生。亦由吳縣辦理。○三十五年議准。江蘇省江浦。安徽省和州。二州縣交界之豐樂宋家。唐馬家。華家。黃墩等六圩。統歸江浦縣管理。其考試報捐等事。亦改隸江浦縣。所有

現隸和州之捐納各生。即改歸江浦籍貫。以杜日後混冒爭競之端。○三十八年議准。嗣後除寄籍未久。原籍尚有嫡親伯叔兄弟。及本人名下確有田產室廬可倚者。仍照例撥回原籍。不得在寄籍地方冒考報捐。即已捐貢監俱飭令改回外。若原籍僅存疏遠族屬。本人名下並無田產室廬。其入籍年分。已於定例相符者。該地方官查明確實。申詳督撫學政立案。入於寄籍地方應試報捐。仍令地方官彼此關會。不許兩處歧考。違者從嚴究治。其有妄攻冒籍聚衆橫

擊者。按律治罪。○又議准。順天寄籍人員。概令呈明更正。其子弟內如有牽連入籍報捐應試者。除入籍已逾二十年外。具有實非土著。從前寄籍順天之舉貢生監。俱勒令一體改歸。統限一年內著落本生自首。咨回原籍。仍取具該本籍地方官及儒學印結。送部查覈。如逾限不首。及此後仍有詭寄冒混諸弊。不准撥回。即行黜革究治。至大興宛平兩縣童生考試。遵例慎選。素行優謹之廩生。申送該府丞查覈。如奉行不力。聽該府尹指名參奏。照例議處。○三十九年

奏准嗣後各省捐納貢監生。及捐職人員。其有實非土著。並無宗族墳塋田房產業。而原籍本有戶冊可歸者。統限一年之內。聽其自行呈首。在外由州縣申送督撫咨覆改歸。在內取具同鄉京官印結。赴部呈明。換給執照。如逾限不改。查出。一併照例辦理。○又覆准各省生員。如確係遷居數世。寄籍入學。自非無故冒考可比。及入學後。攜家還里。每逢歲試。音信難通。而寄籍地方。並無親支。亦無田產室廬可倚者。飭取地方官印甘各結送部。令其改歸原籍。○四十二

年議准。嗣後順天寄籍之廩生。概令改歸原籍。無家可歸者。並令呈明註冊。如係土著。亦飭取各生互結。以憑查覈。統交順天府尹。飭令該教官分別辦理。○又議准。考試大興宛平童生。向派審音御史滿漢各一員。嗣後南籍御史一體迴避扣除。不得開列。○四十三年議准。河工各員。自通判以上。若竟容親族子弟在該處冒籍者。即照地方官之例辦理。至效力之佐雜及牘官等項微員。與地方原無關涉。其子弟親族。如有現在該處冒籍者。自行首明後。勒令改歸原

籍毋庸將該員革職。若仍徘徊觀望。不即呈首。及嗣後再有縱容子弟在該處冒籍者。一經查出。俱照地方官之例。嚴行辦理。○四十九年覆准。河南省考城縣與睢州劃分地界。即照分定界限酌議分撥。舊隄以南居住之生員。地畝村莊。已歸睢州管轄。仍在歸德府學考試。舊隄以北居住之生員。北岸地方。現隸考城縣管理。即歸衛輝府學考試。至原住隄南嗣後遷居北岸者。照現居地方改撥。其因被水移居舊隄頂上之隄南諸生。原係暫時棲止。舊有田產廬墓。既

在南岸。仍入於歸德府學考試。並飭各該州縣查明。現在改隸籍貫。按名註冊報部。以杜兩地跨考之弊。○五十年議准。湖南省永綏廳設學以來。外屬生童冒占不一。所有冒籍之廩。增各生。概令改歸原籍。其已經出仕及捐納職銜貢監。並撥入府學之人。是否寄籍合例。一併立限六月。徹底查明。分別更正。如既經清釐後。仍有他籍民童。冒該廳籍應試。或此次查辦不實。後經查出。將本生及保結各生。照例治罪。其失察各官。交部照例議處。○五十二年議准。軍流各

犯子孫。如係到配後所生成丁者。作為軍籍。其
本籍所生者。必須發配隨行。俟至配所十年。方
許入籍考試。並嗣後軍流發配時。由該地方官
查明本犯嫡屬子孫隨配者。分別年歲。填註文
批遞交配所地方官驗明立案。俟扣定年限。再
行入籍。其或本犯在籍時已生親子。又立有繼
嗣者。止准親子隨配。繼子勒歸本宗。若本犯在
籍時委無親子。久經立繼有案者。准將繼子隨
配。俟到配後生有親子。而繼子原籍確有嫡屬
可倚。仍將繼子放還本籍。勒令歸宗。不得憑占。

軍籍。至本犯原有子嗣數人。不願俱赴配所。即分別去留立案。已留本籍者。不得再入配所。軍籍考試。已隨配所入籍考試者。不得復回原籍考試。統俟十年限滿。由配所督撫將入籍緣由報部。並移咨本省備案。以杜日後跨考之弊。○又議准。廣東省新甯縣客童。仿照商籍及江西棚民之例。另編客籍字號考試。仍移知嘉潮等原籍。不得復回歧考。其捐納各項。並准以新甯報捐。至應試時。令該各童等出具五人連名互結。交該教官查覈。如有槍冒跨考及勒捐妄攻。

等弊。查明分別從嚴治罪。○五十三年覆准。貴州學政條奏思州府鄧姓生員。勒令改歸湖南芷江縣一摺。查定例本非此地之人。而新來入籍者。以居住二十年為限。至族大丁多之戶。散處四方。以一姓而分隸兩籍者。惟應嚴加查覈。禁其兩處跨考。以清冒濫。未便不論入籍之久近。一概勒歸本宗。今鄧姓於康熙四十五年。即在思州府應考。迄今已八十二年。若因其居住芷江縣。遽將現在生員多人。全數勒歸湖南。恐此例一開。凡入籍別縣之人。已合二十年定例。

者。或仇讎忌嫉。或地棍挾持。告訐日繁。或援此案以藉口。將不勝其紛更。若以生員隔境居住。難於約束。勢必此縣之生員。即不准寄居別縣。尤屬難行。所奏應毋庸議。惟是芷江思州地界毗連。鄧姓生童應試者衆。若不嚴立章程。恐跨考之弊。在所不免。應飭各該州縣徹底清查。凡鄧姓生員。現籍隸思州者。其子孫永遠不許在芷江考試。現籍隸芷江者。其子孫永遠不許在思州考試。○五十八年覆准。流犯親子。已入軍籍考試。入學補廩出貢後。隨父釋放回籍。准其

仍留歲貢歸入原籍應試。並查明有無存留子弟。一併勒令回籍。毋得仍留軍籍。蒙混跨考。○五十九年議奏。嗣後生童呈請入籍者。寄籍地方官。先確查該生室廬。以稅契之日為始。田畝以納糧之日為始。扣定二十年以上。准予移會原籍。令原籍地方官據文立案。應試本生及子孫。自改籍之後。再不許回原籍跨考。具文移覆寄籍地方官。由寄籍申詳督撫。咨明學政。准其入籍考試。立案之後。設再有妄行告訐攻擊者。照定例治罪。若入籍之始。不行呈明。將該生童

究辦。並將不行查之該管官。交部議處。奉

旨。此等寄籍生童。嗣後如有未經呈明入籍。即寄籍已滿二十年例限。未經呈明。執行冒考者。一經發覺。除照例黜革。不准應試外。並著咨明原籍地方。亦不准其復在原籍考試。俾跨考倖進之徒。知查出後。寄籍原籍。均無進身之路。庶各知自愛。不敢復蹈前轍。所有此次冒考之洪檀。即照此辦理。○嘉慶三年議准。生童清釐籍貫。原以防冒占跨考之弊。嗣後年限雖滿。未經呈明。不准再試。如果遵例呈明。地方官確實查覈。其田廬稅契納糧。在二十年以

上。即係已滿例限之人。原可據詳立案。准其應試。不必於呈明後再扣年限。但其入籍必須扣滿二十年。方許呈報。或鄉曲居民未諳定例。具呈稍遲。地方官細查本人從前並無冒考等弊。亦可覈准。不得於將滿未滿之前。先為呈明。致滋冒混。凡生童具呈後。寄籍地方官限十日內覈辦。原籍地方官據文立案。不必取結。亦於十日內移覆。仍於申詳文內聲明。以杜弊竇。○九年議准。除實在取巧跨考蒙混冒籍者。情節本重。仍嚴行禁錮外。若寄居已久。置有田廬。年例

已合。僅止未經呈明。並未兩處跨考者。仍照舊例辦理。○又覆准。寄籍民人。不諳定例。未經呈明。率行報捐。黜革之後。若令其照衡工例加一倍捐復。未免與被人舉發者。無所區別。嗣後令地方官查明。果無跨籍捐考情弊。咨部查覈。生監職銜。均照常例捐復。不必加倍。監生職銜。則戶部國子監換給執照。生員。則禮部註明學冊。令其一體在寄籍應試。如有實係無力者。准其呈明。生監止准頂戴榮身。不准應試。仍報部註冊。其貢監生執照。毋庸繳銷。生員如有不甘頂

戴榮身者。仍令其原名應試。○十一年議准。遷居寄籍。歷六十年以外者。即與土著無異。不必補行呈明。即准其在寄籍捐考。惟於捐考時。取具族鄰甘結。聲明原籍。不得復回跨考。仍由寄籍地方官。知照原籍地方官存案。有跨考者。照例褫革。其籍端攻訐者。照誣告例治罪。○十二年

諭。通政司副使閻泰和奏。請清查外省冒籍一摺。據稱山西省近年以來。南省士子接踵冒籍考試。入學補廩者。相繼而起。其中獲登科第。身任職官者。亦不乏

人請飭交山西巡撫嚴令地方官實力查禁等語。冒籍混考。希圖倖進之弊。不獨山西為然。各直省恐亦在所不免。自應一體飭禁。以杜弊混。惟是欲嚴冒籍之禁。必先端始進之階。士子報名應試。總須本籍廩保出結。方准與考。即由捐納等項出仕者。亦必有本地方官印結。與其紛紛查辦於事後。曷若慎重於事先。嗣後各直省督撫。應飭令地方官。於士子考試出仕之初。實力查禁。俾冒籍者無可倣幸。其業經中式現任職官。准其自行呈明。應改歸原籍者。照舊例行。

○又

諭周廷棟奏大宛兩縣童試冒籍較多。據實奏請查辦。一摺。考試為抡才大典。而府縣試尤為士子始進之階。文風各省不同。學額亦定數不一。自應嚴禁冒籍。以遴實學。而息紛爭。京師大宛兩縣。為四方人文萃聚之區。向來多有南省士子希圖倖進。冒籍應試者。歷經科道條奏清查。而此弊相沿已久。仍未肅清。總由不肖廩保扶同徇隱。而特經派出之審音御史等。又視為積習相沿。懼干嫌怨。仍不實力稽查所致。現在正屆順天府試之期。已派出御史達德鄭士超二員。前赴貢院會同該府丞審音。該御史等逐一詳細

確查。秉公點驗。如一經查有弊竇。即著據實奏。其應如何立限勒令呈明改歸原籍。並酌予罰懲之處。詳查舊案。妥議具奏。欽此。遵

旨議准。除從前進士舉貢監生。現在寄籍已至二十年者。與入籍之例相符。毋庸議外。其未滿二十年者。自此次查辦部文到日為始。勒限一年。令其自行呈明。如遵例入籍者。無論進士舉人生監。均由順天府轉飭兩縣確切查明。或室廬稅契。或田畝納糧。並取具親族鄰佑保結。准其入籍報部立案。仍扣滿年限。方准本身子弟應試。並

行文原籍地方存案。不得復回跨考。情願改歸原籍者。俟查明取結。即歸原籍收考。永不許復冒寄籍。如逾一年之限。始行呈明者。貢士罰停殿試一科。舉人罰停會試一科。生監罰停鄉試一科。儻經此次勒限清釐以後。再有混冒考試者。一經查出。即行斥革。跨考倖進者。照例斥革治罪。其民人有寄籍順天。初屆二十年入籍者。照例令其自行呈明。由順天府確查合例。報部存案。方准收考。及報捐貢監應試。至應考之始。保結為先。嗣後歲考用廩保八名。科考用廩保六

名。其寄籍補廩者。查明入籍已久。方准派充。府考後。不准補考補送。仍於每次考試時。令該廩保各出具並無冒籍甘結。由教官查覈加結。申送府丞學政衙門。於審音時。仍令御史詳加查覈。如有假冒。即行嚴叅。該管官不實力稽查。仍照例議處。○又議准。貴州省黎平開泰混入永從學之廩增附生。令該學政查明。如寄籍年例已合。准其補行呈明。在永從縣考試。子孫不許復回原籍歧考。其年例未合者。即令撥歸原籍。令教官管束。子孫不得復至永從冒考。違者照

例斥革治罪。○十五年議准。湖南省乾州鳳凰
永綏保靖四廳縣苗疆士子及苗生鄉試。於嘉
慶十三年另編字號。分別取中。原為鼓勵苗疆
地方起見。嗣後民占苗籍各生。分別撥歸各原
籍考試。其子孫自撥歸後。概不准在該廳縣考
試。該寄籍民人。不得因僑寓已久。援例入籍。致
妨苗疆士子及苗生等上進之階。如再有民人
混冒影射。查明係在另編字號以後捐考者。從
嚴懲辦。○十九年

諭給事中吳邦慶奏請飭查冒籍童生。以肅功令一摺。

據稱本年大興宛平兩縣考試童生。冒籍甚多。經該縣斥逐一百餘名。尚未淨盡。甚至廩保等於出結識認時。有爭執毆詈情事。現屆府考之期。請旨查辦。並將未經斥逐之冒考童生十八名。開單呈覽等語。順天大宛兩縣童試。向來冒籍者多。歷經查辦飭禁。近年弊混未除。致有廩保等互相爭競之事。自應詳加釐剔。以端士習。著該府承會同此次審音御史。將單開冒籍各童生。並此外有無蒙混應試者。逐一查明區別。照例覈辦。○又覆准江蘇省海門廳轄沙地。前因廳地未設專學。諸童附通州考試。謂之沙籍。

自嘉慶十七年海門廳設立專學。凡廳轄生監俱飭歸廳籍。不隸通州。前經中式者。概撥歸海門廳籍。其子孫永不許復由通州捐考。以杜跨冒。○二十年奏准嗣後軍流人犯子孫年例相符。呈明入籍時。由該地方官詳查原案。覈其罪非竊盜。於身家並無違礙者。詳明學政覈定後。准其子孫應試。仍由該學政咨查。覈其有罪犯竊盜。援照積匪猾賊例開擬者。其子孫不准考試報捐。○又題准浙江省海甯州屬南沙地方。改隸蕭山縣管轄。其應試文武生童。自嘉慶十

九年歲試為始。令赴蕭山縣投考。嗣後由各該地方官時加查察。永不許各生童有跨考情弊。

○二十三年

諭御史王允輝奏嚴禁順天鄉試冒籍一摺。冒籍跨考。例禁綦嚴。但恐日久玩生。又復混淆滋弊。茲據該御史奏本年順天鄉試。冒捐北監。冒入北員中式者頗多。著順天學政及順天府尹嚴行查察。順天寄籍生監。如有未滿年限。及未經呈明冒考者。無論已未中式。一經查出。立即嚴參。照例斥革。以清戶籍。○道光二年奏准。兩廣地方除承耕土司役田各戶。仍

照舊例不准考試外。其承耕糧田各戶。與內地佃戶無異。無論曾否退田。俱准送考。若有未完糧銀。仍不准考。○又奉

旨。江西鉛山縣監生丁煥瑚。於未滿二十年例限以前。即以寄籍報捐監生。著照部議褫革。不准頂戴榮身。其該撫援照嘉慶十三年已准頂戴榮身之宜春縣監生藍芬榮成案。業經禮部檢舉。藍芬榮著仍照定例一併褫革。所有從前辦理錯誤之該地方官。及漏未指駁之禮部堂司各官。俱著交部分別議處。○四年議准。湖南省零陵縣所有由民入徭現居徭

地各戶。令該縣逐戶查明。徭糧戶名完糧印串。及田園廬墓戶族人等。確有可憑者。取具徭頭甲長切實甘結。造冊通詳立案。本戶子孫准入徭籍考試。其有雖居徭地而無完糧的戶。及無廬墓可憑。並已經入籍之子孫。日後有遷居民里者。即不准徭籍冒考。並嚴禁附近民人。毋許擅入徭地圖買徭田。徭民亦不得將田畝賣給民人。並將民里荒田私自開墾。如有故違。照例嚴行懲辦。○又覆准四川省九姓鄉童生。與瀘州童生。同日考校。該處界連納谿。江安。敘永。永

甯興文各廳縣之中。恐有歧冒之弊。所有九姓鄉糧民鑄戶立戶撥糧等事。均令赴州呈明過撥。以便考試查對。○十九年奏准。嗣後遇有寄籍之人。並未呈明。一經查出。雖二十年例限已符。概行照例斥革。如有願捐復者。照例准其捐復。如無力捐復。止准頂戴榮身。不准應試。○二十五年

諭。嗣後同城異縣父子籍貫舛錯者。限一年內呈明更正。如其父已故。間有兄弟異籍者。應令各入各籍。所生子孫。即以本身之籍為籍。不得復行兩縣通考。至

初應童試良民祖父並未應試於初屆報考時查明現在所居室廬並取具各結送考既考此縣無論取進與否以後縱有遷移亦不得復考彼縣○又覆准江蘇省太倉鎮海兩衛旗丁均以衛備編身為斷各歸坐落州縣應試不得任便互考○二十六年議定嗣後每屆鄉會試年分照不准更名之例凡舉貢生監俱不准其改籍俟鄉會試竣再行照例辦理○二十八年議定嗣後凡呈請入籍之人其已滿二十年者必須呈明有案由寄籍知照原籍不得復回跨考方准入籍其已

滿六十年者。必須取具族鄰甘結。由寄籍知照原籍。不得復回跨考。方准應試。至由寄籍改歸原籍之人。其寄籍地方官文結內。必須聲明何年月日呈明入籍。曾經知照原籍在案。並何年月日取具族鄰甘結。應試。曾經知照原籍在案。不得以呈明有案一語。含混蒙蔽。其原籍地方官。亦須於文結內聲明何年月日寄籍何處。曾經呈明。或曾經取有族鄰甘結。由寄籍知照原籍。並未復回跨考。方准改歸原籍。不得以祖墓均在原籍一語。含混蒙蔽。如入籍時未經知照。

原籍。是明明有心跨考。概不准其入籍。亦不准其改歸原籍。○三十年議准。嗣後凡冒籍跨考。斥革者。不准捐復。有冒籍大宛犯案者。先將廩保斥革。審訊有無受賄。分別治罪。永遠不准捐考。並將審音御史查取職名。照例議處。○又議准。凡同省異府。同府異縣者。均照同城異縣之案辦理。具有承繼歸宗者。飭令於未考以前。呈明立案。知照兩籍。不得跨考。方准入籍考試。○咸豐元年議准。順天寄籍貢監等。當以有無墳墓為斷。其現據呈出墳契各生。經順天府傳訊。

看墳人等。供俱相符。再令順天府尹飭大宛兩縣親往訪查確實。取具切結。加具印結。咨部覈明。准其補行呈明入籍。仍罰停鄉試一科。行文原籍。永不准復回跨考。若祖父尚屬浮屠。及並無墳墓各生。其去來尚屬未定。勒令改歸原籍。亦罰停鄉試一科。由順天府出示徧諭。如有似此情節者。均照此一律辦理。予限一年。補行呈明。不得違逾。如有寄籍未滿年限。及已滿年限。未經呈明。廩生濫為出保。地方官濫為送考。日後自行查明檢舉。照失察公罪例議處。如或別

經發覺。照徇庇私罪例議處。○二年覆准流寓孔氏寄居他省。業已各入各籍。自不應仍回山東。四氏學跨考。以杜冒混。○同治五年

諭。瑞麟將益澧奏遣散客民。沿途安靜一摺。並請准客民編籍考試各等語。廣東肇慶等處土客各民。構衅械鬪。仇殺多年。經瑞麟將益澧派兵彈壓。勸撫兼施。將客民給資遣散。分赴高廉雷瓊及廣西之賀容貴等縣。平南戎圩等處安插。該客民沿途行走。俱屬安靜。辦理頗為妥協。所有新遷客民。准其附入各該州縣。另編客籍。一體考試。每童生二十人。准其取進一

名。以示鼓勵。○六年奏准嗣後順天直隸各屬生員。再有改籍而兼改姓名三代者。無論同日呈請。或分次呈請。均止准頂戴榮身。不准以原資捐考。○八年議准。廣東省鎮平縣安插高明新甯等縣客民三千餘名。援照成案。於鎮平縣另編客籍考試。○十一年議准。各省候補人員。縱令子弟及幕友官親蒙混入場。嚴行查禁。仍責成送考出結各官。不得稍涉瞻徇。致干叅處。儻有冒籍。即將本生及在事各官。一概究辦。○光緒元年議准。安徽省廣德州。招徠開墾客民。十餘

年來置有田產廬墓入冊輸糧。數與廣東客民考試成案相同。即以同治十三年煙戶糧冊為斷。由地方官查明。現在就耕者若干戶。有志應考者若干丁。果無原籍可歸。而又身家清白。別無違礙。取結造冊立案。入於廣德州應試。仍移明原籍。不准跨考。其有籍可歸。暨在光緒元年以後。續來就耕完糧者。仍遵照定例。按照稅契納糧之日。扣足二十年以上。方准入籍考試。將來生齒日繁。不得因此請加學額。應考之童。毋庸畫分土籍客籍。一律憑文取進。○三年議准。

甘肅通省州縣地畝。有應行招墾之處。由陝甘總督查明該廳州縣。果有荒田未闢。戶口彫零。其外來墾戶。又距原籍寫遠。歸考綦難。及無籍可歸。而身家清白。並無違礙事故者。自領地承糧之日為始。扣足十年。呈明入籍報考。仍查係墾戶嫡屬。方准應試。一面移會原籍扣考。並將入籍應試姓氏年分。詳細造冊。取結報部。如墾戶係該縣附近人民。仍照定例辦理。○四年議准。安徽省建平縣客民。就墾寄籍。已十餘年。准其援照廣德州客民考試成案辦理。○又覆准。

奉天府昌圖廳現升府治。設立府學。添設學額。已不屬奉天府管轄。所有前撥奉天府學各生。其籍隸昌圖者。俱改歸昌圖本籍府學管束。○五年議准。廣東省鎮平縣客籍童生。甫經報考。即有冒籍。令其暫停考試。俟文風日盛。再由學政酌量情形。奏明開考。至其餘客籍。以既經考過為定。嗣後不准再在各州縣另行編籍。以示限制。○七年議准。安徽省甯國縣客民就壑寄籍。已十餘年。准其援照客民考試成案辦理。

欽定大清會典事例卷三百九十二

禮部

學校

優恤諸生
挑選僧尼

充補贊禮

承襲奉祀

優恤諸生。○順治十三年

諭各省提學。將各學廩增附名數。細查在學若干。黜退若干。照數冊報。出示各該府州縣衛張挂。俾通知的確姓名。然後優免丁糧。○康熙九年題准。嗣後生員如果犯事情重。地方官先報學政。俟黜革後。治以應得之罪。若詞訟小事發學責懲。不得視同齊民。一律扑責。○二十二年覆准。各省學租有

發給貧生將所餘以充兵餉者。有竟不給發者。嗣後令各直省督撫給發廩生貧生。以助膏火之費。○二十七年議准。嗣後學田租賦。除通稽各學田原額若干。每年額租若干。先造清冊報部外。每年終將用過某費若干項。贍過貧生某某若干名。詳開舊管新收。開除實在。造冊報部。如冊報隱漏遲延。賬貧虛名無實。及教官學霸豪強之家。私據侵占者。查出按法追究。○雍正十二年議准。已經褫革之貢監生。審明果係無干及拖欠錢糧革後全完者。地方官即詳請開

復其或抑勒索詐。並故捏情弊詳請者。查出。將地方官議處。○乾隆元年

諭。任土作貢。國有常經。無論士民均應輸納。至於雜色差徭。則紳衿例應優免。乃各省竟有令生員充當總甲圖差之類者。殊非國家優恤士子之意。嗣後舉貢生員等。著概免雜差。俾得專心肄業。儻於本戶外別將族人借名濫充。仍將本生按律治罪。○又議准。生員有應戒飭者。地方官會同教官將事由具詳學政。酌斷批准。然後照例在明倫堂扑責。如因一言抵牾。輒任意呵叱。不待申詳。不會同教官

擅自扑責者。聽學政糾叅。以違例處分。學政亦不得袒庇生員。違公批斷。○三年

諭。各省學租。原為散給各學廩生貧生之用。但為數無多。或地方偶遇歉年。貧生不能自給。往往不免饑餒。深可憫念。朕思身列膠庠者。自不便令有司與貧民同給升斗。嗣後著該督撫學政。飭令教官。將貧生等名籍。開送地方官。覈實詳報。視人數多寡。即於存公項內。量撥銀米。移交教官。均勻給散。資其饘粥。如教官開報不實。給散不均。及為吏胥中飽者。交督撫學政稽查。即以不職叅治。至各省學租。務須通融散給。

極貧次貧生員。俾霑實惠。此朕體恤生員之意。若諸生員不知自愛。因此而干預地方。肆行不法之事。該督撫等仍應照例稽查。毋使蹈於罪戾。○八年議准。江西省學租甚少。分給不均。嗣後南昌吉安南安贛州南康建昌六府學無租者。聽府庠生員報名。分附各縣冊後。一體均勻散給。○十年

諭江蘇各屬。向有學租一項。以供給發廩生並賑恤貧生之用。此固國家體恤士子之恩也。但聞向來學臣賑貧。每於考試事竣。始據各學冊報給發。其中弊端種種。不一而足。朕思與其散賑於考試將竣之日。何

如散給於士子雲集之時。則耳目衆多。貧者不致遺漏。而不貧者亦難以冒支。嗣後著該學政轉飭各學教官。確查極貧次貧。造具花名細冊。於案臨之日。投遞該學政覈實。即於三日內逐名面賑。則貧生均霑實惠。該教官等如有混開等弊。亦易查出叅處。○嘉慶五年議准。嗣後應戒飭之生員。地方官擅自叱責者。降二級留任。因而致死者。降二級調用。係故勘致死者。照律治罪。○十六年

諭。姚文田奏請嚴禁文武生員充膺領催甲長一摺。文武生員。不准充膺官役雜差。載在學政全書。定例綦

嚴原以生員為齊民之秀。國家培養人材。身列膠庠者。各宜潔修自愛。豈可承充官役。自取侮辱。若州縣官押令承充。即係顯違定例。啟伊等以交通官吏之門。此弊諒不獨豫省為然。著通諭各省督撫。嚴飭所屬州縣教職。申明舊例。文武生員。毋得派充官役。雜差。從前有詭名濫充。著一概撤退。

充補贊禮。○康熙二十五年議准。各省府州縣衛學贊禮生。照國子監例。選擇在學肄業文學兼優儀表端整聲音洪亮者。補充大學六名。小學四名。考試時准為優等。仍行報部。○三十三

年議准。凡地方大小各官。惟

萬壽聖節元旦冬至春秋二丁祭用生員贊禮。大中
小學。均不得過四名。其准為優等之處停止。

乾隆十六年議准。直省

文廟春秋丁祭。向設禮生四名。皆以生員充補。其餘
先賢先儒有世襲五經博士。承奉家廟祭祀者。
各家子弟原可贊襄奔走。毋得擅給禮生執照。
違者由該督撫據實叅處。○三十一年議准。先
賢先儒家廟禮生。如有私給執照。借名招搖者。
嚴行禁止。查出一概銷毀。○三十五年覆准。

闕里

文廟原額設有禮生六十名。雍正年間復因建立
崇聖祠添設二十名。嗣後挑選禮生。除廟佃戶子
弟四十名外。其餘四十名。准將曲阜縣俊秀挑
選補足。仍造冊送部查覈。○三十六年覆准。浙
江省西安縣孔氏為

至聖南宗所有

聖廟歲時祭薦與曲阜同。其

大成殿及

四配兩廡

崇聖祠等處需用禮生四十名。即於本氏族人中
儘數選充。如有不敷。將西安附近俊秀挑補足
數。仍造冊送部查覈。

承襲奉祀。○直隸省。宛平縣周召公祠。元氏縣
封龍書院孔氏。長垣縣和曲處孔氏。開州先賢
仲子墓。宋程子顥祠。昌黎縣唐韓愈祠。博野縣
宋程子顥。程子頤祠。容城縣明楊繼盛祠。高陽
縣明孫承宗祠。永年縣明申佳允祠。吳橋縣明
范景文祠。灤州宋張橫渠祠各一名。○山東省。
至聖孔氏裔曲阜縣。

至聖廟西廡

先賢孔子忠先儒孔安國中興孔仁玉祠

至聖林孔叢子墓兩觀臺筆架山朝陽洞講書處孔道輔墓泗水縣泉林寺鄒縣尼山五老峯登臨

觀風處尼山觀川亭尼山講書堂尼山之側

顏母井尼山中和壑處尼山曬書臺尼山文德林

慎獨齋曝書臺甯陽縣遺像書院汶上縣釣魚臺。

至聖廟宗魯堂。郟城縣傾蓋亭。費縣登東山而小魯遺像書院。曹縣過化書院。單縣琴臺書院。淄川

縣夾谷山攝行相事處各一名。曲阜縣聖兄孟
皮墓。鄒縣尼山

夫子洞。尼山毓聖侯。尼山坤靈洞。中庸精舍。率性堂。
嶧山石像書院。魚臺縣曝書臺。鉅野縣西狩獲
麟處。泰安縣泰山登臨處各二名。曲阜縣燕申
堂。授玉堂。

啟聖王墓。石門學易書院。舞雩壇。崇德書院。雙相圃。
鄒縣尼山發祥紱麟書院。尼山誕育書院。嶧山
燕居書院。汶上縣中都宰祠。嘉祥縣獲麟書院。
郟城縣問官書院。武城縣聞絃書院。肥城縣大

成書院濟陽縣聞韶書院各四名。鄒縣中庸書院六名。曲阜縣洙泗講學書院息鄒春秋書院汶上縣聖澤書院各八名。曲阜縣

至聖廟崇聖祠十名。

復聖顏氏裔曲阜縣

復聖廟東廡

先賢顏子高顏子祖顏子之僕二世魯大夫顏歆

晉顏髦北齊顏見遠唐顏真卿顏杲卿西廡

先賢顏子曾顏子何顏子辛三世魯大夫顏儉唐

顏師古陋巷井陋巷故址鄒縣嶧山

顏子石。尼山

顏母故宅。泰安縣泰山仰高臺東阿縣

顏子祠。鄆城縣

顏子祠。沂州府顏真卿祠平原縣顏真卿祠費縣

顏真卿祠顏杲卿祠各一名。滋陽縣城南古陋

巷甯陽縣泗高

顏子祠各二名。曲阜縣

啟聖殿祀國公。滋陽

顏子祠各四名。

宗聖曾氏齋嘉祥縣

宗聖廟寢殿東廡西廡

啟聖殿東廡西廡

啟聖寢殿在城書院東廡西廡芸瓜臺三省亭

曾子墓曾氏墓在城書院

先賢曾子點二世先儒曾元曾申曾華三世先儒

曾西濟甯州

曾子祠嶧縣

曾子祠滕縣

曾子祠城武縣文亭山

曾子祠費縣

曾子祠聊城縣

曾子祠各一名。嘉祥縣在城書院影堂。三省堂。鄆

城縣

曾子祠郊城縣

曾子祠臨朐縣

曾子祠各二名。

亞聖孟氏裔鄒縣

先賢孟孫氏祠墓孟仲子祠墓。

孟子曝書臺祠范縣

孟子廟青州雪宮書院萊蕪縣止巖祠各一名。鄒

縣

亞聖廟寢殿西廡孟仲子

啟聖邾國公殿

孟母端範宣獻夫人殿

孟母養蠶祠廟戶營三遷祠

孟子祠墓南宮子适祠墓

孟子三徙館祠甯陽縣

孟子祠滕縣上宮書院存心堂居休館祠嘉祥縣

孟子祠濮州

孟子祠沂水縣

孟母祠在平縣

孟子祠各二名。鄒縣

孟母斷機堂三遷故址家祠滕縣性善書院各四名。

元聖周公裔曲阜縣

元聖周公廟正殿配饗魯公寢殿城北

周文王廟寢殿望父臺泮宮鄒縣東野祠濮州城南

草寺

周公廟各一名。曲阜縣城北

文王廟二名。

周公廟東廡西廡各五名。又荷澤縣曹叔振鐸祠。定陶縣墓各一名。先賢先儒歷代名臣裔。曲阜縣至聖廟東廡樊子須。任子不齊。榮子旂。公孫子龍。曹子卬。宋周子惇頤。張子載。張栻。楊時。明胡居仁。薛瑄。西廡左邱子明。司馬子耕。鄭子國。

崇聖祠。從祀宋周輔成。宰子子墓。魚臺縣閔子祠。樊子須墓。費縣閔子祠。卜子祠。汶上縣仲子廟。榮子旂墓。明宋禮祠。荷澤縣冉子季祠。莒州卜子為宰處。濟甯州任子不齊祠。高子柴祠。陳子亢墓。明薛瑄祠。四忠祠。徐標。李燭。阮應兆祠。東

阿縣高子柴墓甯陽縣陳子亢祠石子作蜀祠
鄆城縣陳子亢祠冉子有墓先儒杜子春祠齊
河縣宰子予祠滋陽縣和聖柳下惠祠卞子祠
鄒縣澹臺子滅明墓萬子章墓顓孫子祠配位
顓孫申詳諸城縣公冶子長祠墓鉅野縣宋張
栻祠蘭山縣晉王祥祠王覽祠王羲之祠曹縣
五冉堂冉子有祠高密縣漢鄭康成祠福山縣
明孫遇祠嘉祥縣澹臺子滅明祠宋李侗祠利
津縣明李益祠德州明蘇祿國王墓武城縣明
王道祠各一名。歷城縣閔子祠范縣閔子祠沂

水縣閔仲山祠閔仲山先賢祖廟東平州仲子
廟河澤縣冉子雍廟冉子雍舊址祠堂冉子雍
墓曹縣冉子雍祠鉅野縣卜子廟寢殿東廡西
廡曲阜縣

聖廟西廡高子柴各二名泗水縣仲子廟濟甯州仲
子廟范縣仲子廟曲阜縣端木氏

至聖林廬墓堂肥城縣冉子耕廟正殿東廡冉子耕
墓各三名。歷城縣閔子墓四名。○山西省平遙
縣周尹吉甫祠墓永濟縣

孟子祠介休縣漢郭林宗祠宋文彥博祠曲沃縣

唐裴度祠。夏縣。宋司馬光祠墓。河津縣。明薛瑄祠墓。襄陵縣。明高邦佐祠。各一名。臨晉縣城邨。

孟子廟。杜邨。

孟子祠。新邨。

孟子祠。

孟母三徙祠。襄陵縣。

關帝廟。各二名。○河南省。上蔡縣。

至聖阼廟。

曾子祠。西平縣。封人請見處祠。榮澤縣。端木子祠。
祥符縣。

孟子游梁祠許昌縣

開帝廟偃師縣唐褚遂良祠靈佑襄濟黃大王廟南陽縣唐張巡祠墓安陽縣宋韓琦祠洛陽縣宋呂蒙正祠墓湯陰縣宋岳飛祠內鄉縣元魯柝祠鹿邑縣明軒輅祠墓鄆城縣明劉校祠廬氏縣明耿裕祠河內縣元許衡祠輝縣

國朝孫奇逢祠各一名儀封廳

今改鄉

至聖擊磬堂中牟縣二程子祠各二名。○江蘇省青浦縣

至聖衣冠祠墓常熟縣周吳泰伯祠仲雍祠仲雍墓

言子故宅家廟專祠文學書院言子墓卜子祠
宋宗澤祠陳元大祠程子顯祠程子頤祠明陳
逅祠褚不華祠昭文縣言子習禮堂宋周容廟
吳縣吳仲雍祠季札祠晉范甯祠宋范仲淹祠
范氏書院范氏祠忠烈廟范仲淹祠范純仁墓
張選祠明周順昌祠墓武進縣

孟子祠周商子瞿祠漢毛萇祠唐蕭穎士祠宋周
子惇頤祠鄒浩祠墓黃庭堅祠蘇軾祠張塋祠
張栻祠范仲淹祠胡瑗祠元陳祖仁墓明沈應
奎祠謝應芳墓段氏祠劉純仁祠白瑜祠陽湖

縣吳季札祠墓晉卞壺宋卞長卿祠劉子翬祠
孫觀墓鄒浩祠墓張栻祠薛極祠劉師勇廟明
毛憲祠陸簡祠顧士傑祠白昂墓陳洽祠墓無
錫縣吳仲雍祠宋胡瑗祠明顧可久祠馬士奇
祠墓江陰縣

文廟西廡周施子之常奚谷子歲宋程子顥祠徐歲
祠包拯祠耿秉祠明湯沐墓趙用賢祠徐晞墓
李應昇墓戚勳祠墓

國朝徐之龍祠丹陽縣商傳說祠吳季札祠漢楊
震祠宋陳東祠墓尹焞祠墓湯東野祠明吉棠

祠崇明縣有子祠樊子須祠蕭縣

孟子廟顓孫子三遷臺顓孫子墓宜興縣漢毛萇
祠吳周魴祠宋邵材祠邵雍祠陸九淵祠銅山
縣漢張良廟明權謹祠元和縣唐沈傳師祠宋
朱長文祠朱良祠徐爽祠文天祥祠明盛杲祠
姚圭姚希孟祠墓元金宏業祠崑山縣唐張振
德祠墓華亭縣唐范履冰祠宋范仲淹祠范純
仁祠明楊允繩祠墓金匱縣宋朱子錫山書院
嵩山書院明俞德惠祠荆溪縣宋蔣興祖祠明
萬士和祠徐溥祠徐鑑祠靖江縣宋范仲淹祠

丹徒縣宋周子惇頤祠朱子祠陸秀夫祠宗澤祠墓甘泉縣宋范仲淹祠胡瑗祠吳江縣明沈漢祠婁縣明陸樹聲祠墓南匯縣明方孝孺祠太倉州明顧夢麟祠嘉定縣明黃滔耀祠歸有光祠

國朝陸隴其祠溧水縣明齊泰祠墓江浦縣明莊杲祠墓山陽縣仲子祠各一名江陰縣吳季札祠宋周子惇頤祠孔垕祠蕭縣顏孫子祠宋岳飛祠各二名江陰縣繆昌期墓三名贛榆縣仲子祠四名高淳縣

至聖廟六名。○安徽省。六安州

至聖祠。安慶府

曾子祠。宿州。閔子祠。墓。仲子祠。壽州。畢公祠。廬江
縣。漢毛義祠。合肥縣。宋包拯祠。墓。元余闕祠。明
周璽祠。翟能祠。懷甯縣。元余闕墓。桐城縣。明張
澤祠。當塗縣。明陶安祠。宣城縣。明陳迪祠。墓。貴
池縣。明黃觀祠。石埭縣。宋丁黼祠。太平縣。明周
怡祠。各一名。婺源縣。朱子家廟。二名。○江西省。

金谿縣

至聖祠。貴溪縣

至聖祠。宋陸九淵祠。墓謝枋得祠。永豐縣。

曾子點祠。

曾子祠。

宗聖祠。宋歐陽修祠。羅開禮祠。元劉黻祠。墓。明鄒樸祠。墓。鄒瑾祠。聶豹祠。墓。魏冕祠。鍾同祠。墓。德化縣。晉陶潛祠。

國朝周岱生祠。浮梁縣。唐金安祠。義甯州。宋黃庭堅祠。墓。德興縣。宋程端蒙祠。墓。董銖祠。墓。王過祠。墓。鄱陽縣。宋江萬里祠。廬陵縣。宋胡銓祠。墓。明曾鳳韶祠。墓。都昌縣。宋江萬里祠。墓。元陳誥。

祠墓。玉山縣宋汪應辰祠。弋陽縣宋陳康伯祠。
墓。謝枋得祠墓。餘干縣宋趙汝愚祠墓。張吉祠。
墓。明胡居仁祠墓。樂平縣宋洪皓祠。元馬端臨
祠。明許瑗祠。崇仁縣元吳澄祠墓。安福縣明李
時勉祠墓。劉球祠墓。鄒守益祠墓。傅應貞墓。峽
江縣明練子甯祠。金幼孜祠。涂貞祠。靖安縣明
況鍾墓。新昌縣明吳甘來祠墓。新城縣宋李觀
祠。各一名。德化縣宋周子惇頤祠墓。義門陳氏
祠。廬陵縣宋文天祥祠墓。各二名。新城縣賢溪
書院。

至聖祠四名。○福建省。連江縣宋李彌遜祠。明吳文華祠。墓莆田縣宋李宏祠。柯潛祠。明鄭岳祠。陳彥回祠。陳俊祠。將樂縣宋楊時祠。歸化縣楊時祠。尤溪縣朱子祠。浦城縣宋真德秀祠。松溪縣真德秀祠。光澤縣李方子祠。順昌縣宋廖德明祠。閩縣宋祝穆祠。周子惇頤祠。古田縣宋林允中祠。林用中墓。李侗祠。明林英祠。墓福清縣宋林栗祠。墓漳浦縣宋高登祠。仙遊縣宋陸秀夫祠。沙縣羅從彥祠。各一名。○浙江省。衢州府至聖專祠。正殿慈谿縣宋黃震祠。墓江山縣宋徐揆。

祠常山縣宋邵雍祠嘉善縣明魏大中祠墓平
湖縣

國朝陸隴其祠墓山陰縣明劉宗周祠各一名。衢
州府

至聖祠東西配東西哲東西廡各二名。

崇聖祠三名。會稽縣

夏禹陵一名。○湖北省。江陵縣

關帝廟。應山縣明楊漣祠墓。江夏縣明熊廷弼祠各

一名。黃梅縣宋岳飛祠。江夏縣岳飛祠各二名。

○湖南省。安福縣

至聖孔氏長沙府

文廟復聖顏子甯鄉縣宋張栻祠墓華容縣明劉大
夏祠龍陽縣明青文勝祠各一名。道州宋周子
惇頤祠二名。○陝西省。汧陽縣周燕子伋祠墓
咸甯縣漢董仲舒祠墓華陰縣漢楊震墓扶風
縣漢馬援祠華州唐郭子儀祠墓藍田縣唐柳
公權祠宋呂大中墓呂大防墓呂大鈞墓呂大
臨墓鄆縣宋張子載祠墓各一名。○四川省。鄰
水縣孔氏蓬州孔氏各一名。○廣東省。南海縣
新橋市

至聖祠雙溪房

至聖祠。宋朱子祠各一名。始興縣唐張九齡祠二名。
○貴州省。思南府明申祐祠。婺川縣申祐祠各
一名。○廣西省。泗城府

國朝岑繼祿祠一名。○康熙二十五年。詔准。聖賢
嫡裔有充奉祀生者。仍給衣頂。確開名數報部。
○雍正二年。議准。先賢有祠宇處。查明嫡裔給
予印照為奉祀生。日久弊生。致有假照冒濫等
弊。嗣後各處設立奉祀生。關涉衍聖公者。俱令
衍聖公會同該撫學政照例查覈。報部換照。其

各省由督撫學政者。亦嚴查咨部。○乾隆四年
覆准。行聖公將各省給照之奉祀生。徹底清查。
將舊存新添數目。詳細開明。如有病故頂補。將
從前原頒部照送部繳銷。以杜冒濫。○五年議
准。各省奉祀生。凡有赴行聖公處呈請者。令行
聖公詳加覈定。再行原籍地方。取具印甘各結。
知會各督撫報部。○又議准。奏祀生事故出缺。
將從前原頒部照繳銷。以杜假冒。○二十七年
議准。直省先賢嫡裔有願充奉祀生者。由教官
覈實加結。申送府州縣詳司。送學政督撫會銜。

報部嚴加查覈。照例給照封發。該學政給領。仍責成該管官嚴行查禁。書吏需索等弊。○三十

二年

諭據明德奏查辦孔繼充攜帶奉祀禮生劄付。審係行聖公孔昭煥差往浙江清查族譜。令其帶往。請將孔昭煥交部嚴加議處。並將孔繼充等分別定擬一摺。所辦甚屬公正。國家加恩聖裔。禮遇甚優。行聖公身膺顯爵。自當益矢謹慎。以承先澤。而副優眷。即如承修族譜一事。雖相沿已久。越數年修整一次。亦止應就籍隸山東確查支派可考者。隨時查輯。若其同宗

散處各省。系次既屬遙遠。勢難逐一清釐。徒使差委之人。藉端滋弊。嗣後應示以限制。至廟庭設立贊禮奉祀各生。原以肅將祀典。自應慎擇本省醇謹之人充補。俾就近襄助駿奔。若令外籍無稽之人。濫與其選。轉非所以昭虔恪。又豈尊師重道之本意乎。孔昭煥年幼無知。受人愚惑。輒以空白劄付委及孔繼充帶至江南。覓人填給。甚屬不合。孔昭煥著交部嚴加議處。其奉祀生禮生等項。從前任意充補。未免太濫。嗣後亦應酌定額數。會同該巡撫學政慎選咨部充補。其如何立定章程之處。著大學士會同該部詳細

定議。餘著覈擬具奏。欽此。遵

旨議准。嗣後山東奉祀生。令衍聖公會同該撫學政詳
選頂補。其直隸江南浙江河南湖南四川六省
奉祀生。令各該督撫會同學政詳查嫡派子孫
頂補。仍取具地方官印甘各結咨部換照。儻仍
有私行給照者。照例查叅。至贊禮生一項。直省
文廟向設四名。皆係生員膺充。其餘先賢先儒祭祀
從無額設給照之例。嗣後通行嚴禁。飭令衍聖
公將從前私給執照悉行銷毀。再各省先賢先
儒奉祀。有無額外浮多之處。令該督撫學政詳

查辦理。另造名冊送部。○三十五年覆准。山東省孔氏祀生定額一百四十五名。先賢祀生定額二百十三名。先儒祀生定額十名。共存留三百六十八名。均於山東親支派內選充。報部查覈。○嘉慶十八年議定。嗣後充補祀生有因事他出者。呈明衍聖公。定予限期。不准將執照攜出。仍飭委同充祀生者代為奉祀。如逾限不歸。即將原照送部繳銷。另選合例之人咨部充補。○道光四年奏准。嗣後奉祀生出缺。令現充祀生之嫡長子孫承充。有故。始以嫡次子孫充補。

再有故。准以近支同曾祖以下之人充補。繪具宗圖送部覈定。○十四年。裁汰崑山縣宋臣孫覲奉祀生。○十九年奉

旨。禮部奏查出博士私給劄付一摺。五經博士。例不頒給關防。安徽省亦無程子祠廟。及額設祀生之例。歷次清查私照。均概令銷毀。何以該省六安州販賣煙土之程保齡。復有奉祀生名目。且現在送繳到部之劄付。據該部查由五經博士程所給。並鈐用五經博士程關防字樣。博士程係屬何名。其關防係由何處頒發。著色卜星額將冒充祀生之程保齡及私給劄

付之博士。分別嚴行查究。至私給劄付。久干例禁。今既查出。恐尚不止此一案。著行聖公及各直省督撫學政。詳查究辦。以慎名器。○二十二年奏准。現在纂修則例。除將額設祀生詳載。並將乾隆三十一年後。數准補給之祀生。全行列入外。所有各省現充祀生。令各督撫學政。逐一清查。造冊送部。如有未繳之舊照。即行送銷。未補之懸缺。即行咨補。○二十三年

諭禮部奏。查出博士私給奉祀生執照。請飭查辦。各省奉祀生。設有定額。其充補。應由各該督撫學政。及行

聖公等。於本省嫡裔內選充。由部覈給執照。其有事
故出缺者。將原領印照繳銷。厯經該部通行各省。自
應照例辦理。茲據查出曾紀銓既屬私照濫充。恐冒
濫者尚不止此一人。著衍聖公孔繁灝詳查。各博士
等如有私藏關防。私給劄付。概行送部銷毀。儻仍隱
匿不繳。即著嚴叅究辦。

挑選侑舞。○雍正五年議准。山東曲阜縣樂舞
生入學。俱於現在樂舞生中考取。該學政會同
衍聖公將現在

文廟供事之樂舞生。秉公查明。其不諳音律者。俱著

澄汰照數補選一百五十四名。造具年貌籍貫清冊存案。學政於考試之前。先將樂章音律當堂考驗。果能諳練通曉。然後考其文理優者。酌取四名。入曲阜縣充附。其從前兗州府學充附之三十六名。俱行裁停。○十三年題准。春秋祭祀。例用樂舞。應慎重揀選充補。令各該州縣會同教官。將現在樂舞生詳加考驗。擇其實係本籍俊秀子弟。通曉音律。嫻熟禮儀者。仍行存留。飭令勤加演習。務使熟習禮儀。如有冒濫。即行黜退。將原給執照追銷。其學政給照之處。永行

禁止。嗣後如有學政濫給印照。該督撫即行嚴
叅。其樂舞生如有假冒朋充。把持武斷等情。該
地方官詳革究治。○乾隆五年奏准。各省府州
縣學樂舞生。每學遵用六佾。即照樂舞之數。額
設三十六名。外加四名。以備臨時更替之用。令
各州縣會同教官。考選本籍俊秀子弟。通曉音
律。嫻習禮儀者。方准充補。遇有缺出。另行考選
足數。造冊申報學政查覈。並免其府縣兩試。由
教官冊送府縣敘入考案之後。申送院考。憑文
錄取。○又議准。曲阜

文廟樂舞生。於廟林額設廟戶佃戶。擇其子弟通曉音律。熟習禮儀。兼知文藝者充補。如人數不足以曲阜縣童生挑補。○六年議准。順天府遴選樂舞生。照考試儒童之例。責令取具廩保甘結。由教官加結送縣審音。委係本籍之人。方准選補。至考試時。仍令教官查覈確實。申送院考。如有頂冒情弊。將出結各官。照例叅處。○七年議准。太常寺樂舞生有三等。樂生為上。舞生次之。執事又次之。其常服帽頂。均准戴金盤素銀頂。至各省

文廟樂舞生較之太常寺應加區別。除祭丁仍用藍衫雀頂外。其常服帽頂。但許用銀盤起花銀頂。如僭越者照違

制例治罪。○八年議准。樂舞生等既已趨蹌殿廡。自應諳通文義。應將取進儒童之外。擇其文理頗明者。另案備取。鈔發各學。以充樂舞之用。俟新案既頒。隨將舊案停止。儻其中有不願充補者。亦不得強其從事。○又議准。向來樂舞生多屬張冠李戴。父業子承。弊難枚舉。若另案備取之法一行。恐不肖學政得以網利營私。應令州縣

於與考童生內略知文義者。取具鄰族甘結。會同教官選補。冊送學政查覈。其院試時。仍用廩保童生各結。以防頂冒。至學政於案臨之時。將該屬冊載之樂舞生。飭令提調官按名考驗。實係應試儒童。略知文義者。方准永遠充補。若係目不識丁之人。濫行選充。即詳明黜革。另行選補。仍將濫選之州縣教官。查叅議處。○五十年議准。順天府樂舞生。先儘童生挑選。如實在不能足額。即於願習樂舞之生員內挑取。至童生中由樂舞生入學者。毋庸開缺。俟鄉試中式。另

選充補。其童生選充者。照例給予頂戴。免其府縣考。一體移送院試。所有選充樂舞生之生員。除歲科兩試照舊考試外。如有科考列在三等之人。遇鄉試時免其錄遺。一體鄉試。仍責成該管官督令勤加演習。不得濫竽充數。○道光七年議准。僉生一項。於府縣考試。本係優免。現有未經服闋。僉生名色。混行報考者。此等取巧倖進之事。難保必無。現奉

諭旨。照童生之例。凡縣試時未經服闋者。不准冊送。○同治元年奏准。各省僉舞生。例由學政於遺卷

挑取。准各學教官以俊秀報充。自咸豐三年奏
准報捐之後。山西僅報捐一名。每逢春秋祭祀
不敷分派。於捐項毫無裨益。嗣後將各直省俊
秀報捐。侑舞生一項。概行停止。○同治十二年
覆准。直隸省深州修造

文廟。請召募八十八人。作為額內侑生。覈與會典所
載

先師廟樂舞人數相符。即令照辦。